



**GINJAW KOMITI
WUNPAWNG MUNG DAN SHANGLAWT HPUNG**

WUNPAWNG MUNG DAN SHANGLAWT HPUNG
GINJAW KOMITI TINGNYANG UP
WUNPAWNG MUNG DAN SHANGLAWT KONGSI NINGBAW
WUNPAWNG MUNG DAN SHANGLAWT HPYEN DAP DAP UP DAJU
DU DAJU JUM NBAN LA A
2022 NING SHARE SHAGAN MASAT NINGHTOI MUNGGA

Hkawp, hkungga tsaw ra ai mungchying mungshawa ni hte Wunpawng Mungdan Shanglawt magam gun ni yawng hpe shakram dat nngai.

Dai ni gaw, Wunpawng Mungdan kata de amy kaba lailen hte, hpyen gumshem ladat lang nna mung maden shang nga ai hpyen ni hpe ninghkap shingla gasat ai rawt malan majan hta asak apnawng lai mat wa sai mungshawa ni hte Wunpawng Mungdan Shanglawt magam gun ni hpe hkungga jaw shagrau sha-a shakawn shagrau nga na matu hte, myit dum nga na matu masat da ai Wunpawng Mungdan a Share Shagan Masat Ninghtoi rai nga ai hte maren, Wunpawng Mungdan Shanglawt Hpung Ginjaw Komiti Tingnyang Up, Wunpawng Mungdan Shanglawt Kongsing Nibaw, Wunpawng Mungdan Shanglawt Hpyen Dap Dap Up Daju lit la nga ai, nngai Du Daju Jum Nban La kaw nna Wunpawng Mungdan a Share Shagan yawng hpe chyeju dum shagrau sha-a hkungga jaw dat nngai.

Dip da hkrum ai prat kaw nna awmdawm lawt lu na matu tinggyeng akyu ara yawng hpe kabai kau n'htawm, amy hte mungdan a matu asak apnawng kau ai Share Shagan ni hpe mungchying mungshawa ji nban hte Wunpawng Mungdan Shanglawt magam gun ni yawng mung, tut nawng myit dum manu shadan shagrau sha-a hkungga jaw nga ga ai re.

Ya aten, mungdan a magam lit hpe lata tut gunhpai nga ai magam gun yawng hte mungchying mungshawa yawng mung, anhte a Share Shagan ni shakut shaja gunhpai lai wa sai rawt malan bungli yi-ngam hpe awng padang hte ginchyum dat la lu hkra, tinang hta rawng ai myitchye myitchyang, atsam marai ma hkra hte lit la gunhpai sa wa ra ai.

Rawt malan majan ladaw re ai majaw, dandawng ai hku nna asak apnawng ai ni nga ai zawn, matsing ningting n lu galaw kau ai sha, hpyen wa a lata e asak apnawng mat ai mungshawa ni hte magam gun ni mung nga sai re. Dai zawn re ai Share Shagan ni a jahpan hte mabyin sat lawat ni hpe sawk sagawn matsing ningting galaw da na matu seng ang ai magam dap ni lit la ra ai.

Share Shagan ni hpe shagrau sha-a, hkungga jaw, myit dum nga ra ai hte maren, shanhte a magrau grang ai atsam marai ningja hte kaja ai arawn alai ni hpe kasi la n'htawm, anhte gunhpai nga ai magam bungli hta akyu jashawn jai lang sa wa ra ai.

Hkawp,

Mungchying mungshawa ni hte magam gun dap shawa ni e, dai ni na ten hta Myen Mungdan ting hta mungmasa, hpyen masa, sut masa, hpaji lam, hkamja lam, mungshawa a shimlam, nga-mu nga-mai lam ni yawng shuk shanut hten-za ai madang de du nga sai re. Ndai zawn shuk shanut dik ai mungdan dinghku majan gaw Myen Mungdan a labau hta garai n nga yu shi ai ngu tsun mai ai. Lai sai ten ladaw ni hta bum nga amyu ni sha, hkrum hkra hkam mana sha ai tsin-yam ni gaw, ya ten Myen Mungdan ting chyam hkra byin hkrum hkra shoi chyum nga masai. Ndai zawn byin wa shangun ai a ningpawt tara hkam gaw “Hpyen Gumshem Lailen” re.

Mungkan ting e matsat nna shatsai kabai kau sai hpyen gumshem lailen gaw, tsa ban 21 du shang tim Myen Mungdan hta ninggun ja, ru jung ngang grin dingyang naw byin nga ai. Ndai zawn ru jung ngang grin nga lu na matu, hpyen gumshem lailen hpe Myen amyu kaba lailen, mung maden lai jasat hte ningchyun shanang la-ba ka-up mayu ai makam masham masa ni e makawp hka-yawp shangang shaja da ya ai majaw re ngu mu lu ai. Myen Mungdan hta Myen amyu kaba lailen hpe jai lang ai shaning (75) ning du magang wa sai rai nna, hpyen gumshem lailen a prat ladaw gaw, shaning (60) ning jan wa sai re. Dai re ai majaw, mungdan kata manghkang hpan hkum matut manoi kahtap gala byin nga ai re.

Ya aten, anhte shakut shaja gunhpai nga ai magam bungli a myit mada ai lam gaw, du na ten hta akyu kaja pru, mahtai kaja hkam la lu na matu rai nga ai. Dai re ai majaw, hpyen gumshem lailen hte Myen amyu kaba lailen masa ni hpe ndai ginjang hta padang dip gasat shamyit kau lu ra ai. Dai rai yang chyu sha, anhte a shawnglam tsawm htap lu na re.

Hkawp,

Mungchying mungshawa ni hte magam gun dap shawa ni e, Ginjaw Komiti gaw mungmasa a majaw byin ai manghkang hpe mungmasa ladat hte hparan kau na matu lang hte lang lam tam shakut lai wa yu sai rai tim, Myen amyuu kaba lailen hte hpyen gumshem lailen hpe jum manat da ai Myen Mungdan Asuya ningbaw ni a majaw, mungmasa ladat hte hparan na ninggam de n du lu ai re.

Ya kalang bai Hpyen Gumshem Kongsii gaw 2022 ning, May shata kaw nna rawt malan hpung langai hkrai hpe simsa lam bawngban na matu saw shaga nga ai. Hpyen Gumshem Kongsii hte sa hkrum bawngban ai gaw, hpyen wa hpe n-gun shaja ya ai hte hpyen gumshem lailen hpe masat masa galaw ya ai lam sha re. Ya aten na masa sat lawat hta simsa lam sa bawngban nna, anhte a matu mungmasa manghkang hpe atsawm sha bawngban mahtai shapraw lu na masa garai n nga ai. Lai sai ten na ladat dingsa rai nga ai “Simsa lam ga baw hte manghkang ni hpe hparan la ga” ngu ai hpe kadai mung makam n nga sai re.

Manghkang hpe mungmasa lai sat lai sa hte kaja wa nan hparan kau na myit jasat tup hkra shadang hpring ai ten ladaw du wa ai shaloi, tara rap ra nna, tengman ai bawngban hpawng ni paw pru wa na re. Dai shaloi, ahkaw ahkang ginlut kau ai lam n byin u ga, ya kaw nna tau hkyen shajin let, ninggun kaba hte mungmasa tsun shaga bawngban lu hkra shakut nga ra ai. Mungmasa ningmu kung kyang ra ai zawn, tinang wuhpung wuhpawng a ninggun hpe mung shangang shagrenng da lu ra ai.

Mungchying shawa ni maga mung, jin jin byin nga ra ai. Tinggyeng akyu ara lu na matu hte, tinggyeng mungmasa ahkaw ahkang gyam mayu ai a majaw sha, hpyen wa maga tsap madi shadaw ai myit jasat ni hpe kabai kau ra sai. Mungmasa hta lapran tsap masha kadai n mai nga ai. Hpyen wa a lagaw lata, myi na tai ai masha n nga hkra hte, hpyen wa a bungli hta myit lawm hkum lawm rai sharawng shara gunhpai ai masha kadai n nga hkra, shada da shadum jahprang shading sharai hkat nga mu.

Hkawp,

Mungchying mungshawa ni hte magam gun dap shawa ni e, Myen Mungdan a uphkang tara masa htenza nga ai majaw, mungshawa ni gaw “Ningshan mung hkrit ra, ninggun mung tsang ra” masa byin hkrum hkra nga sai. “Kadai wa gaw jinghku, kadai wa gaw hpyen” ngu ntsen nhten ai

myit hte ginhka la na yak nga sai. Manghkang kaji hpe manghkang kaba byin wa hkra shapau kaba la n’htawm, shada da je yang hkat ai amu manghkang ni mung byin nga ai hpe mu lu ai. Ndai Pran-wan Ladaw hta prat tup mara n dat ya hkat lu ai “Ru-hka” manghkang ni n byin pru wa hkra sadi sa wa ra na re.

Ndai zawn shuk shanut nga ai hpe ginjang langai shatai n’htawm, tai hpyen wa gaw, rau nga rau pra Kachin amyu hte Sam amyu ni a lapran manghkang byin hkra sumprat daw, manghkang jak shachyaw ai lam, Pyi-thu-tsit ga baw hte amyu sha shada da kata manghkang byin hkra ladat shaw gyin shalat hpang nga ai lam ni hpe mu lu ai. Dai re majaw, mungmasa ningmu jaw jaw hte ndai mabyin manghkang ni kaw nna koi yen lu hkra, mungchying mungshawa ni sadi sa wa na matu lajin dat nngai.

Lagu lagut masha ni, gashun gashe da-mya ni mung wuhpung hpaw nna masha asak si sum wa hkra, du baw gyam mya-lu mya-sha ai mabyin manghkang law law byin nga ai hpe mu lu ai. Ndai zawn re ai manghkang n byin na matu, tinang ginra hpe madu buga masha ni nan makawp maga lit la nga ra ai.

KIO gaw hpaji lam hpe n-gun dat galaw nga ai hte maren, Kachin Region hta laika hpaji sharin jawng hpe pat shingdang dingbai dingna jaw na lam n nga ai. Rai tim, laika sharin jawng ni hta hpyen gumshem lailen hte amyu kaba lailen masa ni hpe pawm shangang ya ai sharin achyin lam n shabyin na matu sadi jaw dat ai.

Hkawp,

Mungchying Mungshawa ni e, Myen mung a ka-ang ginra ni hta hpyen majan shuk shanut nga ai re majaw, hkai mu bungli hpe shawoi na zawn shatang du du n lu galaw mat masai. Du na shaning ladaw ni hta Myen Mungdan kata malu masha dumhprut ai lam byin wa mai ai hpe myit dum ra ai. Dai re ai majaw, tinang ginra ni hta n-gu hte malu masha galaw shapraw ai bungli hpe ninggun dat galaw na matu shatsam dat nngai. N-gu hte malu masha ni hpe mung shadawn sharam sadi sahka let manu shadan sa wa na ahkyak nga sai.

Hpyen yen mungshawa ni hpe maigan kaw nna garum jaw ai garum ningtum masing ni mung yawm mat, hkring mat wa magang sai re majaw, tinang sai daw sai chyen shada garum madi shadaw hkat ai hpe n-gun dat sa wa na matu mung shadut dat nngai.

Shawnglam hpyen man shagu hta magam lit gunhpai nga ai magam gun ni yawng hpe htet shana dat ai. Nanhte myit rum ni gunhpai ai magam lit hpe awng dang masan sa hkra myit maju jung shakut gunhpai mu. Nanhte myit rum ni lit la nga ai hpyen man, buga ginra ni hta kasi kaja hte woi awn lu ai, magrau grang ai magam gun kaja ni byin tai nga mu. KIO a mungmasa hpe ahtu hkra, sum machyi wa shangun ai shinggyim ahkaw ahkang tawt lai ai zai mazut lai ladat ni hpe ja ja koi gam nga mu, ninggun jaw dat nngai.

Ginchyum hku nna htet shana dat ai lam gaw, Wunpawng Mungdan a Share Shagan ni hpe shagrau sha-a hkungga jaw ai hte maren, shanhte a dinghku nta masha ni hpe mung makawp maga madi shadaw jaw ya nga ga. Kashu kasha ni a prat rawt jat galu kaba sa wa na lam hpe lajen ren lit garan la, pawn ba garum la ga. Mungchying mungshawa ni ra marit, myit mada nga ai mungmasa pandung de du lu hkra KIO Ginjaw Komiti kaw nna lahkam htawt sit galaw nga ai bungli masing ni a ntsa mungchying mungshawa yawng kamhpa madi shadaw nga ga. Maigan Mungdan shara shagu de chyam bra nga ai Wunpawng amysha ni yawng mung, kanu mungdan a matu shakut shaja nga ai hpe ninggun lu ai. Grau grau shanglawm shakut sa wa na matu mung ninggun jaw nga nngai. Mungchying mungshawa hte Wunpawng Mungdan Shanglawt magam gun yawng a ntsa Hpan Madu Karai Kasang a Shaman Chyeju tut nawng hkam la lu u ga ngu, akyu hpyi ya let, Share Shagan Masat Ninghtoi Mungga hpe hpungdim dat nngai.


Tingnyang Up
Ginjaw Komiti

Wunpawng Mungdan Shanglawt Hpung

2022 ning, August shata (10) ya.